



Extrait de la revue **SingulierS** du 3^{ème} trimestre 2007

Revue des parlers romans de la province de Luxembourg

Editeur responsable: P. Otjacques, rue de la Hette 19 - 6840 Neufchâteau

Rubrique : **Éditorial**

Çu prumî d' décambe ci, dju srans priyés ou Trianon a Lîdje, pou n-aler aplôdi nôs tchanteûs ô 9ime Fèstival dul Tchanson walone. Gn-è toudi a pô près 5 tchanteûs, û binde du tchanteûs ki sont rîfs pou ç't-ocâzion la, èt c' èst vrêmint in plêji d' aler î passer ène bèle chîje. Pace k' i gn-è pou tous lès gouts èt k' lès muzicyins î alèt d' bon keûr pou prèsanter leûs mèyeûses tchansons.

Lu Grand Prix dul Tchanson walone, pûsk' on l' loumot come ça adon, è sté mètu su pîd ou cminçmint dès anêyes 60. Il è créchu jusk'a couniche lu grand sucès dins lès anêyes 70. A ç't-èpoke la, ça fjot ène pâdje dins lès gazètes ; lès djournalisses vnint ôs nouvèles addé lès tchanteûs, èt la tévé RTBF avoyot sès camèras pou lu rtransmète an dirèk... Çu n' èst nin in sondje ! Ç' astot vrêmint la glwâre d' èsse tchwâzi pou s' î présanter. Lu gangnant avot ç' tèlèfone ki sounot, lès djours ki chûvint, èt i signot dès contrats pou fé dès concèrts dins tout l' payis.

Dès tchanteûs d' nosse province ont adon gagné l' Grand Prix èt fwêt la toûrnêye dès sales. Lu prumî, k' èst co dins toutes lès mémwâres, c' èst Jean-Claude Watrin, lu tchanteû gômès d' Sî Mâ (Saint-Mard) k' è adon fwêt ène cârîre du kékes anêyes dins la tchanson, avu dès bons bokèts, fwârt bin mètus an muzike. An 1984, c' èst Bruno Picard d' Örvaye, k' è gagné l' Grand Prix avu « Tchanson po Marie Jane » et « Lu voyadjeû » k' on è co tourtous dins lès orêyes. Roger Joaris, ki dmeûre asteure du costé d' Arlon è gagné an 1985.



« Compost Binde » su l' sin.ne al Forèt (Vresse s/Semois)

Cès bones anêyes la ont dèré jusk' al fin dès anêyes 80, k' ont veû bacher l' agrès dès « média ». Adon, l' sucès dès tchansons walones è baché ossi, pace ku nos tchanteûs ont manké



d' moyins èt d' publicitè. Ç' còp la an 1989, la RTBF k' organisot l' éven'mint, è lèché tumer lès brès et taper la cote su l' haye... Brâmint dès djins ont sté bin dubèlis, d' vèy ku nòs tchanteûs astint inla lèché su l' costé. C' èst adon l' U.C.W. k' è rpris lès rin.nes dul tchèrète pou rmète ça su pîd an 1992. An 1999 c' èst duvnu l' Fèstival dul tchanson walone, avu l' aspaladje dul vile du Lîdje èt du Trianon. « Géna èt Magonette » du Dèrbu (Durbuy) èt Cécile Liégeois d' Dampicou (Dampicourt), ont participé pou nosse province.

Nòs tchanteûs d' Wibrin, « Lès Djiffs », ont promètu d' pârticiper ç't-anêye ci, èt dju l'z-î souwètant l' succès, ca dj' irans lès soutnu ç' djoûr la. Il ont fwèt ène bèle toûrnêye tins dès vakances, t't-a dnant dès concèrts in pô pa t't-avo la province. Il ont ètout rèchu in CD* k' on vous rukmande du l'z-î coumander. Lu vant toûne èt lès tchanteûs walons sont rudmandés dins nos viadjes, c' è-st-insi ku « Géna èt Magonète » du Dèrbu s' ont rmètu an route, èt k' on è polu choûter dès tchansons walones tins mwint' fiêsses, lès dimatches du l' èsté. Vunez, adon aplôdi nòs tchanteûs walon ou Trianon a Lîdje, çu 1 d' déçambe ci a 19 eûres 30, vous nu l' rugrètz nin.

Pierre OTJACQUES

* Le CD des Djiffs est disponible chez Isabelle Geuzaine, route de Moinet, 208 à 6600 BOURCY – BASTOGNE (Tél. : 061/215810).